

江

西

詩

徵

江西詩徵卷十五

南城曾燠賓幕編輯

宋

楊萬里

萬里字廷秀吉水人紹興二十四年進士光宗朝
歷秘書監出爲江東轉運副使再召皆辭寧宗朝
以寶謨閣學士致仕卒諡文節有誠齋集

觀太平寺畫水長句

太平古寺劫灰餘夕陽惟照一塔孤得得來看還不樂竹
蒸荒處破殿虛偶逢老僧聽僧語道是壁間留古畫徐生
絕筆今百年祖師相傳妙天下壁如雪色一丈許徐生畫

水纔盈堵橫看側看只麼是分明是畫不是水中有清濟
一線波橫貫萬里濁浪之黃河雷奔電卷儘渠猛濁清元
自不隨他波痕盡處忽掀怒攬動一河秋水暮分明是水
不是畫老眼向來元自誤佛廬化作金柁樓銀山雪堆風
打頭是身飄然在中流奪得太一蓮葉舟僧言此畫難再
覓官歸江西郤相憶并州剪刀剪不得鵝溪匹絹官莫惜
貌取秋濤懸坐側

見游庵胡先生舍人

澹翁家近醉翁家二老風流莫等差黃帽朱耶飽煙雨白
頭紫禁判鶯花補天老手何須石行路新隄早著沙三歲
別公千里見端能解榻渝春芽

游豐湖

三處西湖一色秋
錢塘穎水更羅浮
東坡元是西湖長
不到羅浮便得休

寄陸放翁

君居東浙我江西
鏡裏新添幾縷絲
花落六回疎信息
月明千里兩相思
不應李杜翻鯨海
更羨夔龍集鳳池
道是樊川輕薄殺
猶將萬戶比千詩

題牧牛亭秦太師墓

函關只有一穰侯
瀛館寧無再帝耶
天極八重心未死
台星三點坼方休
只看壁後新亭策
恐作移中屬國羞
今日牛羊上邱壘
不知丞相更嗔不

明發南屏

新晴在在野花香
遇雨迢迢沙路長
兩度立朝今結局
一生行客老還鄉
猶嫌數騎傳書札
勝喜千擊入肺腸
到得前頭上船去
莫將白髮照滄浪

過楚川淮陰侯廟

鴻溝祇道萬夫雄
雲夢何銷武士功
九死不分天下鼎
一生還負室前鐘
古來大艱愁無蓋
此後禽空悔作弓
兵火荒餘非舊廟
三間破屋兩株松

題湘中館

江欲浮秋去
山能渡水來
嬾閑蠻語雜
欸乃楚聲哀
寒早當緣聞
詩成未費才
愁邊正無奈
歡伯一相開

迓新守值雨

春雨不大又不晴只與行人禁送迎小溪綠漲竟何曾官
路黃泥滑不勝今年送迎乃爾苦去年送迎正如許風嚴
火滅未五更暗行十里雞三鳴行路最難仍最惡平生歷
盡今更覺前人失脚後人笑後人失脚那可料

和仲貞春晚卽事

欲與東風說休吹墮絮飛吾行正無定魂夢豈忘歸花暖
能醺眼山濃欲染衣只嫌春色老此景也應稀

貧難聘歡伯病敢跨連錢夢豈花邊到春俄雨裏遷一犁
閏五禾百箔候三眠只有書生拙窮年墾紙田

筭改齋前路蔬眼雨後畦璫江明處動遠樹看來齊我語

真彫朽君詩妙斲泥殷勤報君去恰恰一鶯啼

題唐德明建一齋

城南前江後山址竹齋正對寒江啟不嫌漁火亂書燈
苦櫓聲驚睡美平生刺頭鑽故紙晚知此事無多子從渠
散漫汗牛書笑倚江楓弄江水

夜離零陵以避同寮追送之勞留簡諸友

思歸日日只空言一棹今真水月間半夜猶聞郡樓鼓
明胡應失永州山

明發新塗晴快風順約泊樟鎮

雨到中宵歇心知逗曉晴排雲數峰出漏日半江明風借
輕帆便天催嬾客行不應樟鎮酒無意待人傾

到龍山頭

影靜長安道涼風響轡銜海天低到水江日晚明帆潮遣
先驅壯聲吞絕島嶺黃塵征袖滿却愧着朝衫

跋馬公弼省幹出示山谷草聖院花醉圖

涪翁浣花醉圖歌歌詞自作復自寫少陵無人張顛死以
翁奄有二子者不論釵股與錐沙更數旱蛟及驚蛇詩仙
不合兼草聖鬼始天嗔教薄命人言愛書緣愛賢紫眉未
必勝青編舊時鬼門關外客如今一字抵尺璧何須千載
空相憶

送王監簿民瞻南歸

潮頭打雲雲不留月波濺窗窗欲流寒夜報晴豈待曉天

江西詩稿 卷之五
公端爲盧溪老盧溪在山不知年盧溪出山卽日還黃紙
苦催得高臥青霞成癖誰能那詔謂先生式國人掉頭已
復煙林深路傍莫作兩疏看老儒不用橐中金

澹菴坐上觀顯上人分茶

分茶何似煎茶好煎茶不似分茶巧蒸水老禪弄泉手龍
興元春新玉爪二者相遭兔甌面怪怪奇奇善幻幻紛如
擘絮行太空影落寒江能萬變銀瓶首下仍尻高汪湯作
字勢嫖姚不須更師屋漏法只問此瓶當響禽紫微仙人
烏角巾喚我起看清風生京塵滿袖思一洗病眼生花得
再明漢鼎難調要公理策勲茗椀非公事不如同施與寒
儒歸續茶經傳衲子

晚春行田南原

西疇前日塵作霧南村今日波生露子雲從來疎廣文衝
雨學稼當辭勤農言秧好殊勝麥其如綠針未堪喫吾生
十指不粘泥毛錐便得倣蓑衣只願邊頭常無事把耒耕
雲且吾志不愁官馬送還官借牛騎歸不用鞍

憫旱

鳴鳩喚雨如喚晴水車夜啼聲徹明乖龍嬾睡未渠醒阿
香推熟呼不磨下田半濕高全坼幼秧欲焦老差碧書生
所向便四壁賣漿逢寒步逢棘還家浪作飽飯謀買田三
歲兩無秋一門手指百二十萬斛量不盡窮愁小兒察我
慘不樂旋沽村酒聊相酌更哦子美醉時歌焉知餓死捐

薄壑水車啞啞止復作

旱後郴寇大作

自憐秋蝶生不早只與夜蛩聲共悲眼邊未覺天地寬身
後更用文章爲去秋今夏旱相繼淮江未淨郴江沸餓夫
相語死不愁今年官免和糴不

夢卜及黃世永夢中尤喜談佛旣覺感愴不已因和

夢李白韻二首

丁在人每憎子亡憎者惻自我失此友但覺生意息猶解
夢中來豈子餘此憶死生知有無賢聖或未測渾作白日
看不記夜許黑尙憐紫鸞姿未舉先折翼只驚玉雪容冷
面帶古色夢淚覺猶濕悲罷喜有得

去年客京都子去我未至得書不得而安用殷勤意猶矜
各未老相見當亦易不知此蹉跎交道遽云墜一坏湖不
仁埋此經世志絃絕諒可益蕙歎庸不悴吾聞佛者流正
以生作累夢中尚微言子豈悲世事

和王才臣再病

詩瘦如春瘦時乖抑命乖病過三日雨門掩半扉柴不而
何曾久於心便有懷端能暮出否溪水減南崖

白沙買船晚至嚴州

重霧凝朝雨斜陽竟晚晴萬山江外盡一塔嶺尖明身小
寧嫌窄途長已倦行子陵臺下水未酌意先清

都下和同舍客李元老承信贈詩之韻

論交何必星霜久白頭得似傾蓋友長安市上李將軍挽
弓舊不論石斗只今有子似渠長清夜讀書雪邊牖雲端
烽烟半點無怪來將軍不好武遺我驪珠三百顆字字鏽
鏹未曾苟得且看錢塘潮草草言攀渭城柳朝家金印
斗樣大情知不上書生肘儒冠多誤儂飽諳毛錐焉用君
知否便應早請終軍纓徑須繫取匈奴首居延蒲類水如
天吹作春風一杯酒歸來冠劍上凌煙剩作功名落人口
如何收斂許光芒也趁槐花黃裏走獻璵雖真不救脰絕
絃何如只停手人生正似風中花榮瘁昇沉豈非偶與若
早賦歸去來名垂萬古知何有不如耳熟歌嗚嗚醉帽欹
傾衣不紐詩流唱和秋蟲鳴僧房問答獅子吼儘令俗客

不妨來白眼相看勿分割

飯罷登山

樹遠通鶯響花晴帶雨痕
登山偶回首隔水見前村
澹往孤無伴清歸笑不言
還家更遲著松菊未應存

題唐德明秀才玉立齋

坡云無竹令人俗我云俗人正累竹玉立齋前一萬竿能
與主人相對寒看竹哦詩筆生力山童怪予遽忘食不但
不可一日無斯須無此看何如詩成欲寫且復歇恐竹嫌
詩未清絕丁寧一竿不可除竹亦何曾減風月

同君渝季永步至普濟寺晚泛西湖以歸得絕句

閣日微陰不礙晴杖藜小倦且須行湖山有意留儂欵約

東疎鐘未要聲

煙艇橫斜柳港灣
雲山出沒柳行間
登山得似遊湖好
却是湖心看盡山

同岳大用甫撫幹雪後遊西湖早飯顯明寺步至四
聖觀訪林和靖故居觀鶴聽琴得二絕句時去除夕

二日

紫陌微乾未放塵青鞋不惜涴泥痕
春風已入寒蒲節殘
尋猶依古柳根

道堂高絕俯空明
上下躋攀取意行
淨閣虛廊人寂寂
鶴聲斷處忽琴聲

早行鳴山

淡淡清霜薄薄冰曉寒端爲作新晴殷勤喚醒梅花睡枝
上春禽一兩聲

戊子正月六日雷雨感歎示壽仁子

今晨忽雷雨天地又發春草木闊紅綠生意密已欣蟄蟲
且徐動餘寒未全仁先生起裏頭三歎一再顰春風吠萬
物不吹先生貧靖怨一束書只博兩袴塵自倚文字工意
取造物真小兒在傍笑笑我浪苦辛去年作客子椒柏羨
主人在家不差勝更用愁此身先生亦一莞我不如兒真
爲我滿眼酤不問醻與醇杖頭日百錢無錢借諸鄰不然
衣可典及此花柳新

上元夜里俗粉末爲繭絲書吉語置其中以占一歲

之福禱謂之蘭卜因戲作長句

去年上元客三衢衝雨看燈強作娛今年上元家裏住村落無燈惟有雨隔溪叢祠稍簫鼓不知還有游人否兒女炊玉作蘭絲中藏吉語默有祈小兒祝身取官早小女只求蠶事好先生平生笑兒癡逢場亦復作兒嬉不願著脚金華殿不願增巢上林苑只哦少陵七字詩但得長年飽喫飯心知謙卜未必然醉中得卜喜欲顛

夏夜追涼

夜熱依然午熱同閑門小立月明中竹深樹密蟲鳴處時有微涼不是風

過秀溪長句

去年來此上已日今年重來未寒食臨溪照影老自羞慙愧春光尙相識秀溪何許好春容最是溪深樹密中海棠開盡却成白桃花欲落翻深紅

題薦福寺

千山底裏著樓臺半夜松風萬壑哀曉夜巡簷看題壁雨聲一片隔林來

甲午出知漳州晚發船龍山暮宿桐廬

一席清風萬壑雲送將華髮得歸身海潮也怯桐江淨不遣濤頭過富春

二月望日

海棠着意喚詩愁桃李纔開又落休小雨輕風春一半去

年今日在嚴州

幽居三詠

釣雪舟

青鞋黃帽綠蓑衣釣雪舟中雪正飛歸自嚴州無一物扁舟載得釣臺歸

雲臥菴

十年兩袖軟紅塵歸濯滄浪且幅巾不是白雲留我住我留雲住臥閒身

誠齋

浯溪見了紫巖回獨笑春風儘放懷謾向世人談昨夢便來喚我作誠齋

贈劉景明來訪

研席相從昔少年白頭誰信兩蒼然來從八桂三湘外憶
折雙松十載前告我明朝還又別對牀終夕不成眠交游
存沒都休說且爲梅花酌玉船

秋雨歎

老子愁來只苦吟一吟一歎爲秋霖居人只道秋霖苦不
道行人泥更深

書落無聲夜有聲只堪醉聽不堪醒簷牙半點能多少滴
入苔堦一寸青

蠟梅

天向梅梢別出奇國香未許世人知殷勤滴蠟緘封却偷

被霜風折一枝

春暖郡圃散策

已覺朝來退祫衣日光風力軟如癡倩誰留許春寒著更
放梅花住少時

垂絲海棠

無波可照底須窺與柳爭嬌也學垂破曉驟晴天有意生
紅新暉一綃絲

食老菱有感

幸自江湖可避人懷珠韞玉冷無塵何須抵死露頭角
荇菜荷花老此身

夜泊平望終夕不寐

櫻桃湖裏月如霜偏照征人寸斷腸醉裏不知家尙遠夢回忽覺路初長

三月二十七日送春絕句

只餘三日便清和儘放春歸莫恨他落盡千花飛盡梨留春肯住欲如何

出永豐縣西石橋上聞子規

花愁月恨只長啼雨夕風晨不住飛出自錦江歸未得至今猶勸別人歸

霜曉

荒荒瘦日作秋蟬稍稍微暄破曉霧只有江楓偏得意夜接霜水染紅衣

小泊英州

人人藤葉嚼檳榔戶戶茅簷覆土牀只有春風不寒乞隔
溪吹度柚花香

春晴懷故園海棠

故園今日海棠閒夢入江南錦繡堆萬物皆春人獨老一年過社燕方回似青如白天濃淡欲墮還飛絮往來無奈春光餐不得遣詩招入翠瓊杯

竹邊臺榭水邊亭不要人隨只獨行乍暖柳條無氣力淡
晴花影不分明一番過雨來幽徑無數新禽有喜聲只欠
翠紗紅映內兩年寒食負先生予去年正月離家之日蓋兩年不見海棠矣

明發陳公徑過摩舍那灘石峰下

遙松煙未消近竹露猶滴石峰矜孤銳喜以江自隔清潭
涵曠紫碧岫過雲白回瞻宿處隄路轉不可覓地迥人絕
影山僻虎留跡下有無底潭上有欲落石是間一徑橫夾
以萬松直樹從何時有陳公所手植陳公今焉在徑松自
寒碧

昨宵望石峰相去無一尺今日行終朝祇繞石峰側石峰
何曾遠江路自不直仰瞻碧辱巖清峽如立壁反覆得細
看何必更登陟後顧江已遠前顧江若塞棹進岸自回天
水未有極簾欣入絕巘舟愕觸潛石東瞰淡未熹北吹寒
更寂岸草不知愁向人弄晴碧

澄潭湧晴暉不風自成花回流如倦客出門復還家江晴

已數日新漲沒舊沙知是前溪雨濕雲尙橫斜

山轉江亦轉江行山亦行風襲照玉鏡素練縈青屏我本山水客澹無軒冕情塵中悔一來事外懷孤征忽乘滄浪舟仰高俯深清餐翠腹可飽飲漾身須輕鷗鵠不相識還作故園聲

危峰瑩無土平地岌孤石如何半巖間亦有小樹碧走空根苦辛倚險榦寒瘠芳蘭間叢生紫蕤濯幽色近香許世聞遠秀絕人摘而我雲外身方茲喟行役

城中安得山無山安得詩我入五華城遠與山水辭有鏡不敢覽塵而我自知解組來歸亭山水奔相隨水光動我巾山色染我衣舟行將一月恨漣～不恨遲山雲來未已江

月皎無淄澑懷放之入出語頗似之

我從靈洲來惟見芳草渡蒹葭隨水遠曠野無立樹挂席
上真陽好山忽無數好山如隱士避世不自露不應官道
傍乃有見山處借識衛叔玠未覩樂彥輔石峰再難得舟
過更回顧

南中山絕佳所恨人煙稀畧無好事人結茅臨深溪峰頂
可月亭岸石卽釣磯空令煙中猿挂崖弄漣漪山多人自
少人遠山益奇我舟行不留過眼山如馳過眼意已足久
留亦何爲

明發白沙灘聞布穀有感

提壺勸我飲杜鵑勸我歸不如布穀子勸我勤耘耔我少

貧且賤不但無置錐筆未墾紙田黑水導墨池借令字堪
煮識字亦幾希啼饑如不聞餒慣自不啼奔馳三十年辛
勤竟何爲髮從道塗白面爲風霜黧夜來白沙灘老命輕
如絲洪濤舞一葉呼天呌神祇生全乃偶然人力初何施
晚間布穀聲如在故山時坐令萬感集初悟半世非一隙
靡不悔數悔容可追有田不歸耕布穀真吾師

謝木韞之舍人分送講筵賜茶

吳綾縫囊染菊水蠻砂塗印題進字淳熙錫貢新水芽天
珍誤落黃茅地故人鸞渚紫薇郎金華講徹花草香宣賜
龍焰第一綱殿上走趨明月璫御前啜罷三危露滿袖香
煙懷璧去歸來拈出兩蜿蜒雷鳴晦冥驚破柱北苑龍芽

內樣新銅圍銀範鑄瓊塵九天寶月飛五雲玉龍雙舞黃
金鱗老夫平生愛煮茗十年燒穿折脚鼎下山汲井得甘
冷上山摘芽得苦梗何曾夢到龍遊窠何曾夢吃龍芽茶
故人分送玉川子春風來自玉皇家鋸圭椎璧調冰水烹
龍魚鳳搜肝髓石花紫笋可衙官赤印白泥牛走爾故人
氣味茶樣清故人丰骨茶樣明開緘不但似見面叩之咳
唾金石聲麴生勸人墮巾幘睡魔勸我拋書冊老夫七椀
病未能一啜猶堪坐秋夕

遊蒲澗呈周帥蔡漕張舶

勝日從公蒲澗遊萬壑聲滿千崖秋一逕如蛇三百曲繞
盡山腹到山頭穹巖千仞敵欲裂仰看飛泉瀉雲窟鏘成

環珮奏成琴濺作珠璣霏作雪步穿危磴攀蒼藤忽上穹
巖頂上行人在半天泉在井不敢下瞰惟聞聲只怪前驅
深不見須臾却向前山轉海風吹袖萬丈長海水去人一
弓遠老僧高臥晏未興先遣長松夾道迎小參古殿黃面
老不見舊日安期生景泰上方半堵壁城中望之雪山白
却從景泰望城中曉日樓臺煥金碧君不見中流千金博
一壺不如遊山飢時粥一盂金印繫肘大如斗不如遊山
倦時一杯酒安期飛昇今幾年祖龍不是不求仙至今年
年七月二十五領城遊人來訪古

二月望日遞宿南宮和尤延之左司郎署疎竹之韻
此君見我眼猶青笑我銀鬚雪點成憶昔與君同舍日咸

渠將雨作秋聲夜來遞宿三更悄葉底春寒一倍生夢入
故園數新笋籜邊破薛幾莖橫

李聖俞郎中求吾家江西黃雀釀法戲作釀經遺之
江夏無雙小道士一邱一壑長避世裁雲縫霧作羽衣蘆
花柳綿當裘袂身騎鴻鵠太液池腳踏金驂攀桂枝渴飲
南陽菊潭水飢啄藍田粟玉芝今年天田秋大熟紫皇遣
列神倉穀一雙鳬雁墮雲羅夜隨弋人臥茅屋賣身不直
程將軍却與彭越俱策勲解衣戲入玉壺底壺中別是一
乾坤水精鹽山兩岐麥身在椒蘭衆香圍玉條脫下潔凝
脂金叵羅中酌瓊液平生學仙不學禪剗心洗髓糟牀邊
諸公俎豆驚四筵猶得留侯借箸前昔爲飛仙今酒仙更

入太史滑稽篇

送趙氏則少監提舉

座主門生四十年江湖契闊幾風煙同朝再接鴛行裏握手相看鶴髮前誤喜論詩追舊事不知呼酒是離筵老懷只作還山夢輸與先生早著鞭

送姜夔堯章謁石湖先生

釣璜英氣橫白蜺欵睡珠玉皆新詩江山愁訴鶯爲泣鬼神露索天洩機彭蠡波心弄明月詩星入腸肺肝裂吐作春風百種花吹散湖湖數峰雪青鞋布襪軟紅塵千詩只博一字貧吾友夷陵蕭太守達人說項不離口袖詩東來謁老夫慙無高價當璠璵翩然却買松江艇徑去蘇州參

石湖

林景思寄贈五言以長句謝之

華亭沈虞卿惠山尤延之每見無雜語只說林景思試問
景思有何好佳句驚人人絕倒句句飛從月外來可羞王
公薦穹昊若人乘雲駕天風秋衣剪菊裁芙蓉暮宿銀漢
朝蓬官我欲從之東海東西湖柳色二三月相逢一笑冠
纓絕醉招和靖呼東坡一吸西湖湖水竭我醉自眠君自
顛路人往往指作仙此輩何曾識此樂識與不識俱可憐
別時花開今已落思君令人瘦如鶴夢裏隨君擣酒瓢同
登天台度石橋瀑布界天瀉雲窟長松拔地攬煙霄與君
聯句章未了帝城鐘動西峰曉海風吹墮珊瑚枝乃是先

生寄我詩火雲燒江江水沸君詩清涼過於水定知來自
雪巢底恍然坐我天台寺

戊申四月九日得請補外初出國門宿釋迦寺

出却金門入梵宮翠微綠霧染衣濃三年不識西湖月一夜初聞南澗鐘藏室蓬山真昨戲園翁溪友得今從若非朝士相追送何處冥鴻更有踪

感秋

昨扇猶午搆今裳覺晨單起來且復臥未敢窺柴關不覺病至此爲復老使然平生性剛燥畏熱長喜寒念昔忝鄉賦踐雪詣春官布褐皆不纊芒鞋繭且穿長亭夜濯足吹燈呻故編買酒破孤悶浩歌殷屋椽何曾悲廩秋山稜聳

腥肩秋風吹我體秋露滴我肝我欲與秋敵秋先令我酸
歎息復歎息誰是長少年

盥漱已云畢危坐正冠衣覽鏡忽見我不識我爲誰自倚
身尙強不悟年已衰舉頭視嘉木向人慘無姿我欲訴渠
老渠乃懷秋悲木悲不解飲瑟瑟聲怨咨我且呼麴生細
細斟酌之我醉不知我更知春秋爲

秋曉寒可忍秋夕永難度青燈照書冊兩眼如隔霧揜卷
却孤坐塊然與誰語屋角忽生明山月到庭戶似憐幽獨
人深夜約清晤我吟月解聽月轉我亦步何必更讀書弄
月欲成句

祇召還京題江西道院

病身祇要早投閒乞得高安政小安山水秋來渾是畫樓臺高處日生寒登臨未足還辭去老大重來畢竟難碧落翠微好將息清風明月夢中看

郡圃鳳山佳處有碧落堂翠微臺

九月一日夜宿盈川市

下灘一日抵三程到得盈川也發更兩岸漁樵稍燈火滿江風露更波聲病身只合山間老半世長懷客裏情西畔天星如玉李伴人不睡向人明

謝王恭父贈梁杲墨

君不見蜀人文字天下工前有相如後楊雄君不見蜀人烏丸天下妙前有蒲韶後梁杲初得梁墨鷄翠糊老夫道梁不及蒲蓬山藏室王校書笑我未識真元菟兩圭水蒼

笏雙闕點漆璧一併贈老夫此意已金石洮州綠玉試松
花星潭黑雲走風沙龍蛇起陸鷹入骨却愁雷電奪神物

走筆謝張功父送似酴醿

西湖野僧夸藏冰半年化作真水精南湖詩人笑渠拙不如儂家解藏雪藏冰簪子山之幽鑊透九地山鬼愁儂家藏雪有妙手分光明麗在翡翠樓向來異二位勝六玉妃夜投玉川屋剪冰作花吹朔風採雲爲粉散寒空醉揮兩袖拂銀漢梢頭萬斛冷不融瓊田望月拾翠羽砌成重樓天半許盤作青蛟吐綠霧亂飄六出薰沉炷人間雪脆那可藏天上雪落何曾香三月盡頭四月首南湖香雪今誰有分似誠齋老詩叟碎接玉花泛春酒一飲一石更五斗

贈寫真水鑑處士王溫叔

我不如森森千丈松我不如濯濯春月柳
鬚疎鬢禿已雪霜皮皴肉皺真老醜葉生
畫時顏尚朱王生畫時骨更腥一生愛山吟
不就兩肩化作秋山瘦君不見襄公鄂公圖
凌煙腰間羽箭大如椽又不見浣花醉圖
粉墨落日斜泥滑驅失脚貴人寒士兩相嗤
畫圖猶在人已非王生王生且停手不如
生前一杯酒

海棠

小園不到負今晨晚喚嬌紅伴老身落日爭明
那肯暮艷粧一出更無春樹間露坐看搖影
酒底花光併入脣銀燭不燒渠不睡梢頭恰恰挂冰輪

競艷嬌紅最是他教人嫌少不嫌多初酣曉日紅千滴晚
笑東風淡一渦自是花中無國色非關格外占春窠開時
慳與渠儂醉却恨飄零可若何

過楊二渡

春去無痕可得尋嬾將詩眼看春心鶯邊楊柳鷗邊草一日青來一日深

宣歙道中

天齊玉立萬孱顏三日深行紫翠間便是昨來千佛閣望
中見此兩州山詩家寒刮少陵骨富樣高梳西子鬟祇好
遙看莫登覽今晨登處鬢都斑

竹牀

已製青奴一壁寒更揩綠玉兩頭安誰言詩老眠雲榻不是漁郎釣月竿醉夢那知蕉葉雨小舟親過蓼花灘蹶然驚起天將曉窓下書燈耿復殘

曉寒

點點輕寒淡淡陰遊人便覺減行春東風也解嫌蕭索自送秋千不要人

春光喚入百花叢寒力平欺兩鬢蓬吹亂衆紅還復整海棠却不怕東風

楊輔世

輔世字昌英吉水人與兄子萬里齊名紹興二十四年進士知麻陽縣有達齋文集

南溪

碧玉寒塘瑩不流紅蕖影裏立沙鷗便教不作南溪看當得西湖十里秋

何異

異字同叔崇仁人紹興二十四年進士歷官監察御史右正言浙西提刑權禮部侍郎知夔州兼本路安撫刑部侍郎權工部尚書告老以寶章閣直學士知泉州乞祠進學士致仕著有月湖集

浮石山莊

天巧不易覲覦巧不難着狐裘或反衣鑄鐵真成錯此亭對此石層層水初落憑高得其要他景皆可略蒼波繞廬

阜白浪繁衡霍魚龍出變怪鱗鱗紛掣攫初疑海上來
根株相連絡又疑泗濱渡清澗可磨琢水石兩奇特賓主一
笑樂猶想峴山亭清名與山託

高峰山

快登十里壇望極千里眼天近風轉清地高日難晚禽聲
自圓熟山色真平遠再來除荆棘踏月歸路穩

安源院

施田樂貳鄉讀書吳吏部石跡猶可尋青山亦如故春深
筍蕨香成熟倉箱富坐久遂忘歸更問鍾山路

鍾山寺

貳鄉追綠野一望飽清泉詩到永嘉上山如靈隱前生涯

歸古寺遺照對枯禪二百餘年話來同三月天

無爲觀一菴閣

樓居草草假三間便覺星辰半可攀最喜坐中先得月不妨睡處也看山林疎啼鳥秋彈曲天闊飛鴻夜掩關對景清吟無限好典衣冷債幾時還

大華山

地靈推寶蓋奇崛跨三州帝座聯樞極星躔值斗牛江南誇絕勝仙伯揖浮邱舊觀依山腳崇壇冠嶺頭懷哉二眞意特地一時畱爭謂神丹熟誰知瑞氣浮妄傳異人氣遠遺老臣收雲外寧交戰風前枉運籌利鋒皆瓦礫勇銳失貔貅歛幟驚逋伏還兵敢逗邇桂司歸內府芝檢動前旒

遺鏃砮牙細經灘馬蹟一承丹鳳詔雙擁翠雲裘功滿
三千行神參八極遊後先鸞與鶴乘跨虎兼虬仙樂宣新
響文枰化故楸元壇開豁敞紫洞鎖深幽雞黍餘空竇龍
投按舊湫斬妖畱血樹化石望仙舟鵝培晴飛雪茶凹暑
挾秋退心披峻嶺淨手掬寒流石銳矛頭似山長劒脊侔
路危行九曲臺險過三休靈藥從人乞薰爐足意謀三廬
騰瑞相五嶽記眞遊雷電歸驅使雲天托庇庥遺蹤難紀
載著句欠旁搜四萬八千歲五城十二樓近疑連絳闕遠
想接滄洲招隱仙翁意吾簪此可投

徐夢莘

夢莘字商老臨江人紹興二十四年進士紹熙中

爲荆湖北路安撫司參議著北盟會編除直秘閣
江西鄉人同仕廣右者十有二重光赤奮若仲秋中
澠講鄉會于湘南樓過彈子嵒

吾儕生江南遠近且鄰鄉一官皆爲貧餬口走四方遇合
良獨難動如參與商誰知自有时朋盍聚炎荒外臺參計
畫幕府佐紀綱出宰得壯縣司敎蒞郡庠曹椽勝三語簿
領真仇香不止似人喜頓覺吾輩張合坐尊序齒避席敬
行觴嵒洞縱登覽杖屢陪徜徉某矢以相娛嘯歌情意長
舉酒起祝規愛我藥石良古人尚植立君子道其常平生
學忠孝餘力從文章臨節不可奪當官有何強窮乃見節
義老當志彌剛鴻鵠在寥廓騏驥終騰驤願言各勉旃富

貴無相忘

劉清之

清之字子澄臨江人紹興二十七年進士累官知

衡州

洞霄宮

青山鎮斷紅塵路石柱千霄藏洞府老蛟據窟不可窺千
古流泉替渠舞真爐容我輒躋攀心曠方知白日闊飛仙
一去忽已遠坐對松梢雲往還

洞庭湖

天孫歲晚會湘靈倒瀉銀河合洞庭上下天光唯一白中
間山色不多青荆潭萬里收塵滓宇宙連宵失晦明莫道

人間少仙境詩魂酒魄一時醒

遊洪陽洞

朝來拔腳座埃底共訪人間小有天喚醒幾年煙墨夢胸中邱壑故依然

謝謗

謗字昌國新喻人紹興二十七年進士孝宗朝累官監察御史光宗朝除御史中丞權工部尚書請祠歸卒初居縣南竹坡名其燕坐曰艮齋人稱艮齋先生

清常寺

佛廬塵不到客枕夢頻驚浙浙山風響纖纖隙月明煙雲

春漸暖鐘磬曉逾清踪跡奔馳裏飄浮媿此生

鰲溪

數板小橋橫晚晴兩行古木弄春榮不知多少夜來雨水
到埠頭渾欲平

玉山觀

微明燈火夜堂幽聽徹絲桐萬慮休骨冷魂清眠不得竹
風蕭瑟滿庭秋

龍回院

堂殿塵埃外軒櫺紫翠中凭欄千嶂雨欹枕半窗風得意
何妨僻尋幽豈易窮分張閒草木一一見春工

延福寺

閱世巖松古隨人徑蘚斑樓臺雲冉冉沙石水潺潺興出
崎嶇外身行杳靄間通天知有路一笑懨前山

絕句

靄靄煙雲望眼昏亂紅翻徑綠遮門一聲啼鳥向何處山
外人家桑柘村

嚴隱君九齡適軒

陶公勲業在姑蘇扁舟歸來春水湖張良亦從赤松子拋
擲兵閒黃石書平吳戮項本無事所適定非真適意戰酣
人境強迴頭晚乃逍遙脫塵累先生之適真天然浩氣養
得歸林泉一生袖却奪標手名利過眼如雲煙清風丈室
數椽足幕天席地月爲燭徑有幽花杖履香窗延野竹縹

細綠天邊白雲不可呼空中野鶴隨所如延年美意復誰
解拂塵岸巾聊自娛松紋簾滑琉璃色臥展南華書一帙
先生之適真天然不速還嗔叩門客

讀書臺

莓苔點點路層層此地分明勝槩增天上樓臺山上寺雲
邊鐘鼓月邊僧青松鶴夢生秋吹寶塔星華見夜燈消盡
塵襟三萬斛石床間倚古蘿藤

李南金

南金字晉卿自號三谿冰雪翁樂平人紹興二十
七年進士光化軍教授

江頭吟

兒時盛氣高於山不信壯士有飢寒如今一杯零落酒風
雨蝕盡征袍單側立崑奴面鐵色楚客不言忽吹笛關山
有月無人聲自是江頭渚花發渚花春少未得妍凝立青
山圍水天杜鵑滿山不解事盡情叫入青楓煙壯事未握
邊頭梨旋頭如月幾時落如今世界不愛賢看取江頭雲
一角

茶聲

砌蟲唧唧萬蟬催忽有千車捆載來聽得松風并澗水急
呼縹色綠瓷杯

登第後畫師以冠裳寫真戲題

落魄江湖十二年布衫澗袖裹風煙如今各樣新裝束典

邵清狂賣邵顛

董 穎

穎字仲達德興人紹興中從汪彥章徐師川遊有

霜傑集

江上

萬頃滄江萬頃秋鏡天飛雪一雙鷗摩挲數尺沙邊柳待
汝成陰繫客舟

京 鐘

鐘字仲遠豫章人紹興二十七年進士寧宗朝拜
左丞相卒贈太保謚莊定有松坡集

曹操疑冢

疑冢多畱七十餘謀身自謂永無虞不知三馬同槽夢曾爲兒孫遠慮無

吳會

曾字虎臣崇仁人高宗朝以獻書得官累遷至吏部郎中出知嚴州致仕卒有得閒文集能改齋漫錄

羅山

兒時聞羅山窟穴居神仙念之每欲往終爲俗累牽茲晨復何夕風日媚晴暄偶與二三子徑來踐前言崎嶇涉岡澗峭蒨凌雲崖斷或如鴻坡平俄若川有泉自何來但覺聲涓涓繁紆若蛇走往注山腹田徘徊一灌足入袖風

翩翩俄登最高嶺中觀屋數椽嶙峋老石像摩挲不記年
桃花破護苔一笑爲嫣然石屏與翠壁擁從相後先物色
恣觀覽萬界滿眼前適問同遊人茲爲第幾天不然何秀
拔不與衆峰連長安在何許無乃落日邊十年苦捨攘戰
血腥戈鋌誰知塵外客一壑能自專茲遊恐難再遲留不
能前如何林間月弄影娟娟催歸猶恨早正恐陵谷遷
何 侮

解字德揚龍泉人紹興中進士爲吏部郎官除福
建提舉有玉雪堂小集

王文孺臞庵

多羨王居士心閒事事幽山從天末見江近枕邊流春圃

千葩秀霑林百果收更能窮物理濠上看魚游
柳外長虹臥江邊小市圓水搖千嶂影窗納五湖天隔岸
誰家圖開帆何處船非關臺榭好此地最堪憐

方思尹

思尹字民瞻弋陽人紹興中知泰和縣章貢兵亂
編木爲柵橫截江流民賴以安累官江西提點刑
獄以老辭

爽軒

鶴嶺重登不作難自緣蘿月喜同攀勝遊不減謝安石佳
士況逢元魯山眼底更無塵事擾窗開又得許時閒丁仙
已有歸來約他日尋盟共往還

劉 僮

僮字寬夫吉水人沈孫紹興中進士官待制

青原臺

春臺百尺枕蕪城傑檻層軒入紫清坐嘯風雲生畫棟劇
談河漢瀉朱甍山圍蘭若青螺遠江帶蘋州白練橫挂席
會凌南斗去羽人遼海看騎鯨

蘇壽元

壽元字仁仲號北溪安福人

贈風鑑

空有奇胸貯石渠功名不許老頭顱憑君細閱寒窗下還
有他年房杜無

趙善應

善應字彥遠太宗七世孫汝愚父隨宦國家餘
子

題寧師西閣

飄泊南來幾歲寒追談往事漫心酸雲煙暮隔中原望歸
折梅花忍淚看

次韻李長卿

一別芳洲不計年舊時攀折柳依然故人似欲撩詩興臘
折梅花向酒邊

趙彥端

彥端字德莊宋宗室紹興中進士爲餘干令以利

民爲本民稱趙母因家焉後歷太常少卿自號介

庵居士有集

玉真臺

春色無窮巷農家有太和病嗟聞道晚貧喜得閒多草徑
烘徐步鄰花幸遠過層臺宜抗謝誰爲買煙波

崇安道中

風柳疎無力秋花冷不香客情隨去燕涼思起啼蠻地入
閩山隘天連越樹長年年擣衣石爲爾感征裳

壽皇太子

日日龍樓閑寢時雞人未動漏聲遲前星一點朝天帝只
有清臺太史知

子晉吹笙未是仙阿不橫梁少全篇小吟青著梅梢句一
日東風四海傳

楊 愿

願字謹仲清江人紹興中進士歷簽書樞密院事
兼參知政事罷提舉太平觀

伏承駒父祕校惠示見和鄙句七言四韻二首降歎
之餘因成二絕往謝

冷官廳事客來稀衆綠陰陰結夏帷忽得君詩愜人意陶
家風到北窗時

只今侍讀周夫子屢說君詩似杜詩速把冠塵盡彈却玉
堂宵直伴王維

尹 稷

穉字少稷兗州人僑居玉山紹興三十二年與陸游同賜進士出身孝宗朝累官殿中侍御史右諫議大夫以言者劾罷

庸醫行

南街醫工門如市爭傳和扁生後世膏肓可爲死可起瓦屑蓬根盡珍劑歲月轉久術轉疎十醫九死一活無北市醫工色漸動大字書脾要驚衆偏收棄藥與遺方縱有神丹亦無用實者爲虛熱爲寒幾因顛覆能全安君不見形神榜然臥一室醫方爭工藥無必左手檢方右顧金兩手雖殊皆劖哉

陳光道

光道字不矜南城人

夢中贈神女蔡寧娘

長恐凡材不合仙喜逢神女熟因緣雲中隱隱開金鎖路
入麻姑小有天

海石榴花映綺窗碧芙蓉亞銀塘青鸞不舞蒼虬臥滿
院春風白日長

老聃西逝卽浮屠莫怪窗間貝葉書長哂楊妃仙格劣郤
教鸚鵡誦真如

玉女倚天多喜笑素娥如月與精神假饒不許長年住猶
勝人間不遇人

吳 章

璋崇仁人沆子

環溪夜坐

江天閒晚已斜陽靜倚柴門對草堂葉落轉枝翻鵠影星
飛橫水帶螢光微風得雋驅殘暑新葉出奇生嫩涼坐覺
秋襟轉清爽一聲漁笛在滄浪

鄒 杞

杞廬陵人

游洞霄宮

天柱古名山形勢友列嶽神人巢其巔陔睡半天落白晝
見雲旗清夜聞笙鶴花源或流虹仙禽猶搗藥長歌不可

見清風灑寥廓

曾

伋

一作汲

伋字彥思南豐人紹興末以大理寺丞出知袁州
慶元間居海昌

題張許雙廟

國憑節義壯洪基激厲頽風屬聖時曾屈帝尊親降輶高宗嘗幸其廟
可因祈福幸公祠

李壁

璧字季章眉山人以父任入官歷任禮部尚書同
知樞密院事以資政殿學士致仕晚遷撫州創峯
峰書院曾輯臨汝間書五十卷卒謚文懿有雁湖

集

金石山

高處渾無一點塵平川極目淨於茵
松聲滿院日亭午世味着人誰識真
倘乞半巖容卜築仍畱別浦待垂綸
寒灰豈復重燃望獨愛新詩語不陳

使北作

天連海岱壓中州
煖翠浮嵐夜不收
如此山河落人手
西風殘照嬾回頭

玉堂畱題

雲影沉沉玉一方
倚闌人意似濛梁
獨憐雪裏山茶樹也
向春風伴海棠

酬會景建

新有千絲明曉鏡舊無一話贊宵衣閑吟此外惟須飲老
覺人間萬事非

青雲亭

平林野水帶孤城倦客登臨太瘦生過眼千花競紅紫可
憐霜鬢轉分明

游少游

少游字希卿南豐人隆興元年進士贑州教授攝
永興令擢知澧州官至朝散大夫賜服金紫有文
集

題石仙洞

石巖欽巘跨龍虎有客巖前避風雨篆文委蛇蟠玉書流
鈴擲火煩守護冷翁蛻骨黃金容千年古木何嵌空無人
喚起玉霄夢閒却碧桃丹杏風令威白鶴去不歸麻姑丹
砂疑是非長松滴翠挹北斗流水泛花迷舊溪

王阮

阮字南卿德安人韶曾孫隆興元年進士仕至撫
州守特召入奏韓侂胄欲見之卒不往怒使奉祠
歸廬山以終著有義豐集

古意

西風策策飄葉鳴錦機停梭人暗驚歸心欲附潮頭去潮
頭不宣到溢城

洞庭九月湖水乾倒影夜懸星斗攢水官爾浪蹴寒玉船
過兩耳聲珊瑚

明妃曲

飛塵漠漠風捲沙明妃馬上彈琵琶一曲思歸譜明
妃淚盡邊兒舞邊兒不道思歸苦更問漢宮餘幾許古來
和戎人似鐵漢家和戎人似雪午窗一抹春山橫萬里關
河不須設燕支塞帳秋復春翠被不禁愁殺人人生不可
無黃金無黃金兮死沉淪明妃也莫怨青塚死有佳名生
有用君不見秦樓當日卷衣女一一空隨宿草腐

新昌書座右屏

私罪不可有公罪不可無退作陶淵明進學何易于但願

列循吏寧甘爲鄙夫禍福置不問吾民其少蘇

館娃宮

釋越來妖豔窮吳事僑遊笑談遺廟社繪屬及山邱鶴宿
離宮瓦龍移別浦舟楯陳金制巧牀瑩玉光浮破雨驚楓
落馳烟入虎流尊羹摘千里荷蓋擁長洲緩緩花開陌彎
彎月照州輕風香徑暖微步屢廊幽紅喜鱸堪切黃噴蟹
不收池痕測朝夕鄉思屬溫柔祇顧山銜日何知餌帶釣
味于重處減心記捧時謀鯨鱉翻溟渤金星犯斗牛六千
君子銳二八國人憂泰伯三稱讓姑蘇一戰休共沈那有
井獨墜苦無樓人去扁舟遠僧來野寺修宮烏今駭散臺
鹿任鳴呦月爲瓊闌暗山含翠黛愁燭殘新別淚泉咽舊

歌喉一代響人事千年壯士羞東門抉眼在怒氣溢潮頭

題高遠亭

小攜尊酒作清游行到方壺最上頭山在斷霞明處碧水
從白鳥去邊流苦無妙句窺天巧賴有名亭慰客愁從此
江南添勝景未應獨坐庾公樓

和陶雜詩

遑遑行路難汲汲艱食迫井田邈不再兼并蔽阡陌永懷
先父祖遺我以清白出門無所容疑此天地窄秋風瘦遙
山涼意慄行客江南紀舊遊不歷岐王宅

畱別昌國

扶桑曾見日騰空老去歸田不復東一覺短簷他日夢起

來惆悵曉牕紅

龍塘久別乘月再到奉呈同社

在姑蘇

龍塘疇昔擅雲烟破月重來倍爽然浮玉北堂三萬頃扁舟
西子二千年青山識面爭迎櫂白鷺知心不避船華髮
修修更何往一茅終在此橋邊

張良臣

良臣字武子一字漢卿號雪窗洪州人隆興元年

進士官監佐藏庫其父避寇四明遂家焉著有雪

窗小藁

春詞

佇欄無限楚時春
岸風平綠自

起畫簷雙語燕梨

花留得夜來雲

後主寥香復倚春潘妃梳洗最輕盈南朝破後無詞客燕子桃花古石城

別持上人

修竹永和字浣花天寶詩晴江入舟楫忍淚別僧時

梅市道中

連雨疎篷不耐關修眉如失更晴慳越王故國無人問艇子穿花自往還

九日書呂季慈室

上池入寺見承平影落南州迹易陳手把黃花看新鴈風烟愁殺舊京人

西湖晚歸

帖帖平湖印晚天，
蹋歌遊女臂相聯。
鳳城半掩人爭路，
猶有胡琴落後船。

過西溪

罨畫層波蕙草荒，
冷雲客雁兩回惶。
梅花到得吹成雪，
盡是清愁不是香。

留題吳興投老庵

白鷺悠悠去不還，
渚雲汀草一生閑。
暮年怕入西州路，
空倚梅花說住山。

芳草復芳草

芳草復芳草，
有人孤倚樓。
明月復明月，
何處照離愁。
相見

渺無期此恨詎相知日暮天寒吹屬玉蠻江豆蔻重重綠

玉臺體

一寸春霏拂綺寮蕙花江上雪初消傷心燕子重來地無
復人吹紫玉簫

主人流落委荒墳燕子還來壞戟門惟有桃花古時月端
端正正照啼痕

曉行

千山萬山星斗落一聲兩聲鐘磬清路入小橋和夢過豆
花深處草蟲鳴

柳

柳暗旗亭不忍看臨江愁殺晉衣冠傷心明月揚州路十

里珠簾蕙草寒

感舊

三十六陂春水綠四十九年人事非揚子江頭永嘉後吳
儂蕩槳北人稀

夏夜

恰到黃昏雨便晴青塘蓮遞盡蛙鳴月明已在芭蕉上猶
有殘簪點滴聲

黃度

度字文叔新昌人隆興元年進士寧宗朝累官禮
部尚書以煥章閣學士知隆興府按通志列傳選
舉俱失載茲據

宋詩紀
事收入

青溪閣

江家舊宅枕溪頭誰向溪灣著小樓無奈當年亡國恨潮生潮落幾時休

孫逢吉

逢吉字從之龍泉人與弟逢年逢辰稱孫氏三龍
隆興元年進士累官秘書郎爲韓侂胄所誣出知
太平州丐祠提舉江州太平宮卒諡獻簡

茅亭

陳氏當年爲勝概吾徒今日作良游時遷代謝皆如此細
雨燈花莫浪愁

吳鑑

鑑字仲權崇仁人曾弟隆興元年進士累官司封郎中極言罷歸有雲巖集

崇仙觀

浮邱仙袂風中挹子晉吹笙月下聞翠蓋霓裳君過我尻
輿神馬我從君

人生塵土不可耐天上高寒定自嘉但約麻姑擘麟脯莫
尋句漏問丹砂

送客香山寺

十里香山寺三年到幾回不嫌送客遠端是愛山來老木
依山住閒雲爲我開歸鞍意未足城鼓莫相催

黃然

然豫章人隆興中官右朝請郎知台州

涪翁亭

清音妙絕東坡老方響名高太史公水遶鳥飛談笑外江連洪雅畫圖中

陳琦

琦字擇之清江人張南軒門人隆興間進士爲人明敏纏密能文主衡陽簿民甚德之有克齋集

讀書臺

水色山光面面開乾坤牢落此孤臺寒煙老屋巢沙燕春雨殘碑臥石苔千載英風今可想八州奇夢舊傳來輶車弔古增惆悵重爲先生闢草萊

江西詩徵卷十五